

玉暉堂詩集
二



叢書集成

初編

主編者
王雲五

商務印書館發行

王雲五主編
叢書集成初編
玉暉堂詩集
二冊

中華民國二十六年六月初版

著者

趙

淇

發行人

王

上海河南路

五

印刷所

商

上海河南路

館

發行所

商

上海及各埠

館

四九八

徐

(本書校對者華國章)

玉暉堂詩集卷三

五言律

秋浦曉發

殘月生秋浦。江村戶尙扃。曙光搖塔白。松露滴山青。世態看長劍。天涯逐汎萍。蕩舟出蘆港。東嶺下疏星。

泊裏洋借宿僧舍

晚泊三江外。江流萬里長。暫辭漁父櫂。來問贊公房。石岸懸珠閣。藤牆隱畫廊。夢回殘月下。安穩似吾鄉。

青口出江

出口穿荒荻。江流隔淺沙。洲晴喧浴鷺。風急蹴飛鴉。白髮宜茅宇。青簑負釣車。停帆暮回首。西北指京華。

曉起

殘燈猶挂壁。窗隙見晨光。短髮梳難把。寒衣綵未裝。天涯憂戰伐。歲晚怯冰霜。昨日邗江路。逢人問故鄉。

客六合同張九達登西城二首

幽林來暮色。聯步出松關。偶上城邊閣。閒看雨後山。雲歸峯隱見。潮落水潺湲。之子不相聚。難同慰客顏。

曾識田前路。沿流到石林。叢篁迷舊迹。衰草隔幽尋。寺晚鐘初定。江寒雨後深。僧堂聯旅榻。盡日伴高吟。

雨晴同九達出郭晚望

城邊收積雨。晴色暮天遙。水郭喧漁市。江船集野橋。斷雲明落日。遠岸響歸潮。遣興思醺醪。青帘樓外招。

黃石筍招九達劉六千靈巖山宴集二首

東峯林壑斷。飛練落江波。楚樹連雲盡。吳山隔岸多。平田分細水。高岫挂垂蘿。拄杖深松裏。歸禽集暮柯。半山紅葉寺。下聽暮鐘遲。側足驚苔滑。閒心引杖移。分題詩並和。選勝酒行隨。坐見楓林晚。催還白玉卮。

界首阻風四首

逆風舟不進。晴色競淒清。海日迎霜白。湖波隔岸鳴。行人喧小市。羈客數歸程。已判升沈理。淹留信此生。野泊朝炊晚。齋鹽逐舍求。但能安簡薄。到處得夷猶。亂世貧非拙。通材食不謀。卽教今不去。坐臥有扁舟。停風亦何事。移杖入林間。逐肆懸乾腐。沿街賣凍魚。漕隄平屋脊。湖漲及階除。莫更煩牽挽。殘民饑饉餘。倚櫂起長望。時艱失路多。流亡行自鬻。估客倦相歌。舊稿書仍改。殘毫凍復呵。笑招舟子語。不去耐愁何。

舟夜發

日短舟宵進。荒隄片月寒。長風號亂水。仄岸響迴瀾。水宿開船少。冬殘作客難。故園小兒女。日夜望歸鞍。

黃家嘴二首

口塞村初闢。黃昏過客迷。地形隨岸轉。茅舍逐簷低。几榻連槽檻。庖廚瀾豕雞。夜深投宿滿。片席慰栖栖。當日河初決。塵蹤記屢過。暮投舟子宿。夜聽婦人歌。土著原無幾。廩成未漸多。蘆牆與蓬戶。終日畏風波。

次下相聞王晦如旋里

楚塞兵初解。歸舟下漢川。一官淹歲月。萬里阻烽煙。歧路愁長睡。佳音喜不眠。田園堪慰老。百口羨生旋。宿遷早發

貪路侵晨發。鬚眉結曉霜。寒空凝海霧。初日動湖光。舟纓還依岸。村煙稍出牆。人傳沽酒肆。三里過前岡。覃懷道中

清華新雨後。夾岸稻畦分。野竹連青嶼。山泉下白雲。鳥聲經樹落。樵唱隔林聞。前路覃懷近。塵裝憩夕曛。

孟津渡河

山光雨後真。朝日散河濱。倚櫂東懷土。驅車西入秦。青衫牧豕客。白髮飯牛人。買渡頻來往。臨流暗愴神。

鐵門阻雨

夜雨山村客。瀟瀟聽到明。涼侵窗裏夢。愁落枕邊聲。失路安垂老。違時強遠征。泥塗何日起。淹泊不勝情。

雨餘漫興

滂沱連日夜。積潦泊前除。遠樹鳩空怨。當軒徑半淤。就乾頻改榻。避漏屢移書。獨有西山色。青青伴索居。

立秋前一日曉雨

晨窗響疎雨。浙瀝迴秋聲。秦地涼生早。鄉心夢已驚。桐陰銜墜葉。雲氣暗孤城。徑草愁來夕。啾啾絡緯鳴。

春正見新月二首

新月清宵白。春風小閣深。鄉愁誰共語。客苑自行吟。戍鼓初傳夜。山燈半出林。倦來依宿火。寂寞子雲心。
閉閣便孤坐。空窗燭影深。浮生徒自笑。薄俗付長吟。白紵栖春署。青山憶故林。幾時駕黃犢。一遂買山心。
河上公授經處

春風花落片。古路踏殘紅。空惜塵中客。難逢河上公。傳經千載異。求道寸心同。去去重回首。雲山向洛東。
函谷關

函谷關門啓。荒岡路尙昏。磬鳴山頂寺。雞唱水邊村。雲濯春花淨。雨滋宿草繁。衰年畏塵鞅。登頓憶林園。
慈中

殘月如新月。瑩瑩曉樹閒。終年滯塵土。何日罷關山。驛柳搖煙碧。崖花點石班。幸於驢背上。賒得片時間。
劉敬之嘉賓兄弟過草堂二首

接邑村非遠。尋常負杖游。偶因秋漲闊。得遂草堂留。相憶惟看月。孤吟獨倚樓。忽傳雙白髮。並蹇到林邱。
殘暑秋還熱。移牀坐樹深。短簑呼野老。啜茗伴長吟。濁世安貧意。衰年求道心。眼中賢伯仲。壁立幾千尋。
客天雄宿黃遜庵齋張楓臣夜過卽訂詰朝之約

北舍塵裝解。高齋局寂寥。相招猶隔日。對酒且寒宵。竹月迎簾入。松風拂檻遙。別離懷不淺。餘興續來朝。
次晨赴楓臣招李聖思後至張右君赴列人未返

寒篠依窗暗。雙桐夾徑分。朋遊過便醉。昆季日爲羣。滑酒來供奉。籠鵝少右軍。楚江遊旦暮。揮手隔重雲。

單父贈周子遜

旅舍聯高榻。寒宵會面初。月翻松影亂。風引竹聲疏。雅興猶耽畫。衰年倦著書。不緣江海上。那得遇相如。

雨後朱武林招同周子遜集浣古齋

櫛沐晨初起。高軒折簡催。渾忘公子貴。許汎野人杯。疎竹沾寒雨。長松護紫苔。相攜聯短杖。爲踏水雲來。

陳耐庵招飲

寒夜驅車至。西園放臘梅。笑言新酒熟。恰遇故人來。老友千秋契。窮途一飯哀。九州誰相馬。空失軼羣材。

襄陽遇張六翮二首

廿載洛關別。天涯絕素魚。三經過滏口。未得話離居。留贈詩常把。窮愁老倍初。何期逢漢上。對酒益欷歔。

乍說還疑夢。相看淚已漣。一官疲閱歷。萬死脫烽煙。淹滯原吾道。飛騰憶往年。脊鴿天外影。好買錦江船。

楊少參筠湄夜署讌集詩四首 有引

雪融梅署。月滿松廊。燒畫燭以張筵。促錦鞍而延士。紅牙度曲。梁飛玳瑁之塵。紫露流香。杯泛葡萄之醞。揮塵而座霏玉屑。刻燭則句擲金聲。主人高投轄之風。賓傾北海。詞客陪踞牀之宴。興比南樓。共咏佳篇。獨慙首唱。

好月生新霽。華樽卜夜歡。衰年裘不煖。殘臘雪增寒。一徑穿珠樹。雙燈引玉鞍。上方鐘磬歇。哀角起更闌。候吏留金鑰。傳呼報客來。雪融冰砌滑。燭閃夜園開。欲續尋梅賦。先傾坐月杯。習池泥沒屐。隔日約追陪。

爐煙飄綺席。燭影動流蘇。密座俱佳士。狂吟媿老夫。坦懷傾一世。大雅未云孤。累日壺常接。鄉思片刻無。談深還秉燭。飲劇閒清歌。興豈緣愁減。身無奈老何。乾坤消戰氣。宸極賚恩波。歸臥衡漳上。雲中聽玉珂。

沁洲

署有古松

郵署淹長夏。空廊晝掩門。雲閒聊獨望。松古向誰論。去住隨行侶。栖遲黯旅魂。何如沁漳水。東下繞林園。宿交口

昂車關

四圍山翠合。驛舍解塵裝。細徑下歸牧。遙峰隱夕陽。土風僻近古。嵐氣暮生涼。只似鄉園裏。匡牀臥草堂。空巖四五月。曉色回秋時。市小門開晚。山高日上遲。荒蹊隨澗勢。古穴受雲欺。千里太行道。盤駝北漸夷。并州午日

樂平道中

午日并州客。空階坐曉涼。輕風翻樹影。初日淡雲光。違興開書帙。扶衰檢藥囊。故園當令節。繫縷盼歸裝。樂平南去道。撲面亂山迎。斷壑風雲悍。空巖草樹矜。爲尋鄉路近。渾忘客生輕。對嶺閒驅虎。錚錚矢石鳴。七夕後一日雨霽晚徑移牀

移榻煙蘿外。柴門夜不關。秋空月露重。夕徑野雲閒。小簾涼新雨。孤樽慰老顏。雙星渡何處。銀漢寂潺湲。壽陽旅舍雨後坐月

雨過秋雲斂。涼宵片月清。窮途行向老。多病耐孤征。隔院笙歌促。當階絡緯鳴。淒淒難伏枕。續燭坐深更。
楊學使自雲中柬余月終回署

昨枉雲中札。旌旗至雁門。可堪久離索。未卽晤朝昏。獵騎秋原兔。霜燈夜署樽。新詩應滿帙。相望好深論。
繆乘六江非諾蔡曉萃劉敬枉答寄懷

蒲節分攜後。相思秋漸深。每從雲樹望。難寄別離心。邊地霜前雁。詞人塞上吟。翻憐句注頂。未得附登臨。
懷張西山孝廉

漢江殘雪裏。對策向蓬萊。便道邯山過。憑君鄉信迴。桑乾魏尚蹟。紫塞李陵臺。年少心多感。登高賦擬裁。
曝背

曝背晴簷下。空闌落葉深。天高鳴塞雁。霜早亂秋砧。翰藻文園病。煙波漁父心。幾時雲水外。散髮臥長林。
曉起

夜雨淨秋塵。階苔展翠茵。晴窗開霽日。爽閣淡幽人。好事隨浮世。吾衰謝問津。敢言尋遁迹。巢許亦王臣。
奉和御制送內閣杜公原韻

寅恭無闕職。歸老臥昇平。睿藻翻三疊。天筵布兩楹。元臣高尙義。聖主泰交情。賀監湖山興。千秋風並清。
申臬盟路徵吾李聖友游西山回寄訊二首

聯杖尋丹壑。空巖落葉深。偶因憂世想。得遂住山心。霜澗穿紅樹。雲窗仰翠岑。不知絕頂上。對酒幾回吟。

聞道懸壺腦。嶽奇不易登。千峯攢戶立。曲檻入雲憑。斷磴通垂索。崩崖護老藤。冥鴻天地外。誰復意羅罍。

題申觀仲新齋二首

新築占幽勝。城中見野煙。到門梧竹引。接檻薜蘿牽。君愛居離俗。人疑地近仙。十年費經畫。心上有山川。

曉窗步友人韻

曉窗淡寒日。藜藿信長貧。不作衰榮想。悠然江海人。綠樽溫老面。白髮伴閒身。世上誰知己。相逢漫問津。

春晚過曲安訪彭扶九內弟途中遇雨二首

驅車渡漳滏。帶雨訪情親。啼鳥下村樹。落花霑路塵。烽煙萬里別。老病十年身。今夕春窗酒。相看倍愴神。

老至宜常會。時艱況異居。每逢親友使。得致往來書。多病擎杯懶。長貧見客疎。不知離別後。衰鬢復何如。

李方曼招飲易園二首

故人諸客況。累日命傾樽。獨此溪邊閣。蕭然江上村。雙潭分亥徑。曲岸引衡門。我愛鏡湖叟。詩成得並論。

夜坐

林中織月上。暮景散層城。遠樹蟬初歇。空階暑漸清。塵沙憐薄俗。衰白謝浮名。欲逐乘槎客。江湖未解兵。

夏日贈盧菽甫明府

槐涼清暑寂。政暇但鳴琴。獨有山中鶴。來聽空外音。松華翻露滴。蒲影映簾深。瀟灑陶彭澤。漉巾引客吟。

雨晴

雨晴餘溽暑。桐影轉斜曛。蝸引緣牆徧。苔痕入徑分。閒愁消散帙。老眼眩看雲。冉冉西風至。清秋溷鹿羣。

暑雨過蓮亭卽景應沈郡伯命二首

避暑熊轡引。來尋水上亭。槐涼搖徑綠。荷氣撲簾青。賓從歡前席。鳬鷗浴遠汀。塵纓聊此濯。五馬散郊坰。

江湖戈未息。輸輓歲仍連。游釜終當盡。歌襦此獨偏。閒無虛勝迹。興足寄幽泉。霽色生遙浦。櫓聲歸采蓮。

七夕前一日

疎桐露漸白。涼月下庭隅。斜漢流無際。雙星影尙孤。荷戈沈玉塞。伏櫪困泥塗。多少征人婦。清砧怨夜徂。

秋曉

時寓鵝城千佛寺

秋空初日上。殘月一痕青。白露明珠樹。微風響梵鈴。觀身暫獨拙。入世豈容醒。不問升沈理。生涯信泛萍。

聞砧倣古秋閨體

秋砧夜未歇。思婦意何如。不見雲中雁。空懷塞上書。玉關霜落早。金井葉飛疎。強欲親刀尺。蘭閨淚溼裾。

濟軒上人相招

昨傳開士約。北郭問禪扉。木脫遠村出。天高社燕歸。當年負微尚。此日欲皈依。茅屋妙香引。塵中暫息機。

清明前一日約方昱東訂東郭之遊

瀑川寒食近。客舍約相過。難遇花時好。無愁酒債多。步聯青竹杖。醉入白雲窩。不識來朝咏。能如晉永和。

客高唐憶公車諸友人旋里

別來春已暮。歸道草煙深。我尙淹歧路。君應返故林。園花開倦眼。家醞破愁心。多難看時態。無勞望好音。

清明日攜文仲姪出郭因至李氏園小飲二首

鳴犢逢寒食。晴郊散旅愁。亂花翻錦樹。高柳隱紅樓。半醉開塵眼。狂吟任白頭。名園通近郭。攜手並探幽。金谷花村裏。芳塘抱曲欄。幽禽不選樹。新笋半抽竿。臺榭春雲入。壺觴客興寬。野人珍重意。暮色戀餘歡。

劉雲麓刺史招同劉公定明府于待公將軍成小西宴集李氏園亭二首

名園曾一過。花徑板橋通。聯騎穿晴樹。垂鞭拂野風。百年耽濁酒。雙鬢老飄蓬。客至衡門啓。山童掃落紅。近竹亭能敞。高臺屐可通。雲邊芳草徑。池畔落花風。多難聯佳會。浮生逐汎蓬。接羅從自側。遙嶺夕陽紅。

張御錫招同于待公劉雲麓方克恕文仲姪賞牡丹遇雨

屢接看花約。三春興未孤。牡丹經雨放。綠蟻傍亭呼。白髮隨飛蓋。華筵溷腐儒。遂教歧路客。終日一愁無。

移寓僧舍夜雨口占

官署愁喧雜。來尋僻寺居。下簾聽暮雨。燒燭檢殘書。浮世憐芻狗。塵踪淡木魚。夜深鐘磬寂。清夢迴吾廬。

高唐大覺寺

初地開何代。殘僧只一家。古碑餘斷篆。廢塔噪昏鴉。仄徑蒼池涸。危闌白石斜。珠宮經歲掩。塵滿鐵袈裟。

自東郡返夜至意舫草堂

冬殘日易暝。夕鳥暮飛稀。林暗村燈出。月明人夜歸。敝裘寒欲透。衰鬢老何依。比到衡門下。深更應掩扉。

社集石佛庵

悲心厭秋氣。黯澹臨西風。溪轉得精舍。林端逢遠公。孤懷禪易入。野酌興全同。清話不能去。夕陽挂暮桐。

王灌亭月下見訪

闌花溼玉露。星影淡秋河。不有美人至。將如良夜何。芳樽散羈思。孤興引清歌。好月若相勸。婆娑上薜蘿。

秦仲玉齋中逢苑闕蒼步闕蒼韻

相思閒秋夏。相遇值銜杯。疎雨燈初翦。寒屏菊尙開。好懷多病減。深坐爲君來。聚首且同醉。湖山未草萊。

郊居二首

窮達既有數。吾亦尋吾真。交結謝時輩。行藏問古人。春來何所適。老至不辭貧。卽此悟高隱。禽魚或可親。

白雲非我物。來去每相關。小築何年遂。高眠對汝閒。新泉流晚逕。嘉木透春山。應有鹿門侶。月明時往還。

過趙香雪草堂

孤茅白雲際。野徑引晴沙。之子澹無事。空林倚斷霞。千秋分令望。百里此天涯。不必問窮達。吾生有釣鱉。

社集香雪齋中

芳宴集羣秀。疎陰散遠林。風流吾黨在。江海爾何沈。返照明虛閣。春沙落暮禽。醉中從簡略。雲鶴久無心。

李鶴園招飲繡佛齋

悠然高士心。力疾愜幽尋。纖月生遙浦。疎桐散夕陰。窮愁侵劍冷。風雅訂交深。旣醉不能去。留連山水音。

送王廣生赴甘陵令幕

東郊新雨後。夏木靄餘清。送子來溪上。淒然離思生。窮途攜病往。華髮傍人行。負米懷前哲。予其悉此情。

發鵝城

曙窗呼僕子。結束拂塵衣。倚壁春燈小。欹林殘月微。長貧催客路。多病戀魚磯。遠懷古人意。披裘自息機。

寄汪儀甫伯仲

陶山落木外。悵望隔霜煙。每語天下士。聞君兄弟賢。擁書寒坐月。愛友夜呼船。何日同罇酒。頽然徑竹前。

送樸姪依父讀書陶山

家貧輕骨肉。十六去園林。幸有趨庭別。聊安遲暮心。寒宵清淚接。長道曉霜深。莫更矜年少。征衫薄自任。

遊天雄張楓宸嶧谷宣公九達臨秋起陸右君招同王幼輿朱汗朱趙香雪李聖思小集分韻得寒字

相逢俱素好。白髮謬交歡。下有吾徒醉。誰憐歲暮寒。霜高圍燭小。月小入簾看。惆悵嚴城夜。分攜興未闌。

成伍嵐翰林過訪

太史湖山興。青年薄一官。不辭冰雪出。來問野人寒。賣賦貧能懶。謀生老未安。畫闌梅影綠。許共倚罇看。

之大梁留別天雄故人

白髮憐生事。淒然向酒卮。可憐爲客日。復作贈離詩。坐月吟梁苑。因風憶大伾。流連看夜色。清漏隔雲遲。澶淵道中次鶴園韻

十載常歧路。支離彊此身。江山愁伴客。詞賦老依人。春草憐裘敝。霜華入鬢新。笑談之子在。端可謝風塵。宿衛河寄懷朱汧朱

春星低遠樹。燈影倚窗清。記別朱公子。遙憐芳草生。隔鄰聞夜語。近枕落溪聲。咫尺梅花徑。無由話此情。聞鶴唳二首

深宵坐不寐。燭影淡相看。何處唳孤鶴。蕭蕭渡曲闌。哀音真有訴。欲問卻無端。或亦鍛雙羽。徘徊渡夜寒。月明矜玉立。野性未全平。不向山中老。應甘世上情。自知非俗尙。誰與說孤清。待到籠開日。松巖時一鳴。寄錢太常玉章先生

功成期入道。林壑暫徜徉。每語大君子。俱推錢太常。朱絃揮素月。白紵引流觴。何日扶藤杖。題詩上玉堂。寒食舟過無錫

錫山寒食路。晴曉望江天。游女閒如畫。孤槎杳若仙。遠花紅笑日。近水綠浮烟。不向此中過。悠悠八九年。僦宅

僦宅臨春水。窗中聞棹歌。虎邱新雨足。鶴市夜寒多。不寐依銀燭。含情憶釣簑。何年謝塵事。浩蕩臥巖阿。

樓上

樓上春寒劇。溪邊暮雨收。簫聲花榭酒。燈影市橋舟。客興惟高枕。人情閱敝裘。范公千載後。誰復五湖遊。

登玉峰山絕頂

少壯看山興。江湖老不違。釋舟穿暮雨。孤杖伴塵衣。倚樹聽幽籟。分雲坐翠微。晚林懸霽景。明月照人歸。

贈馬殿聞二首

憶晤慈仁寺。秋燈對夜闌。懷人增白髮。別夢繞青山。帆雨三江闊。松雲一徑閒。此逢真不易。細酌慰離顏。

夏閣新移石。春欄舊種花。竹涼搖晚徑。簾影映晴沙。曲室藏書滿。澄溪帶檻斜。馬卿看奏賦。侍草近清華。

薄暮移舟再登玉峰山

不倦登臨意。扁舟晚復行。板橋曾受屐。沙樹昨聞鶯。水宿仍依郭。山遊翻入城。暮煙迷鹿苑。懷古一含情。

雨

夜雨涼生幔。瀟瀟枕上聞。清晨猶著屐。亭午未開雲。影澹江湖白。聲霑雁鷺羣。空簷獨來往。溜響正紛紛。

行次南屯便訪張素元羽士

南國行初發。途經羽客廬。入門花影接。高柳鳥音疎。鄰嫗供期饌。山童摘野蔬。塵中復長夏。小臥夢徐徐。

臨淮道中遇雨

長道霏江雨。逢人問驛亭。近塘新稻綠。隔樹暮山青。草店簷低接。柴門夜不扃。傳餐呼客起。倦臥目難醒。